

摘藻堂四庫全書薈要

集部

欽定四庫全書薈要

集部

曲江集卷一  
三

臣 王杰 詳校

詳校官助教 臣 常循



欽定四庫全書薈要

曲江集目錄

卷一

頌贊賦

卷二

雜詩

卷三

雜詩



卷四

雜詩

卷五

雜詩

卷六

制書

卷七

勅制

卷八

勅書

卷九

勅書

卷十

勅書

卷十一

勅書

卷十二

勅書

卷十三

表狀  
并御批

卷十四

狀  
并御批

卷十五

狀  
并御批

卷十六

策書序

卷十七

雜著

卷十八

墓誌

卷十九

碑銘

卷二十

碑銘

臣等謹案曲江集二十卷唐張九齡撰九齡字子壽韶州曲江人官至尚書右丞相貶荊州長史卒贈荊州大都督謚文獻事迹具唐書本傳徐浩作九齡墓碑稱其學究精義文叅微旨而不及其文集卷數唐宋二史藝文志文獻通考俱載有九齡文集二十卷其後



流布稍稀惟明文淵閣書目有曲江文集一部四冊又一部五冊而外間多未之覩至成化時丘濬始從內閣本錄出韶州知府蘇韓為刊行之其卷目與唐志相合蓋猶宋以來之舊本也九齡守正嫉邪以道匡弼稱開元賢相而文章亦有名於時不獨以事業勲猷見重徐堅嘗論其文如輕縑素練實濟時用而窘邊幅柳宗元則謂其兼攻詩文但不能

究其極然九齡感遇諸什神味超軼可與陳  
子昂方駕文筆博大典實有垂紳正笏氣象  
亦具見大雅之遺堅與宗元所言乃文人抑  
揚之詞不足以為定論至所撰制草明白切  
當多得王言之體本傳稱為秘書少監時會  
賜渤海詔而書命無足為者乃召九齡為之  
被詔趣成因遷工部侍郎知制誥今檢集中  
有勅渤海王大武藝書當即其時所作而其

他詔命亦多可與史傳相參考如集中有勅  
奚都督右金吾衛大將軍歸誠王李歸國書  
而核之唐書外國傳所載奚事自開元以後  
僅有李大酺魯蘇李詩延寵婆固諸酋長名  
而不及歸國知史文有所脫漏不及此集之  
得其實是尤可以補史之闕矣乾隆四十二  
年九月恭校上

總纂官臣紀昀臣陸錫熊臣孫士毅

總校官 臣陸費墀

欽定四庫全書薈要卷一萬三千五百五十五

集部

曲江集卷一

唐 張九齡 撰

頌 贊 賦

龍池聖德頌并序

開元紀功德頌并序

聖應圖贊并序

開元正厯握乾符頌并序

白羽扇賦并序及御批

荔枝賦并序

龍池聖德頌并序

臣聞昔者玄德升聞皇天眷命元聖有作上帝何言必見意於休徵不忘象於幽贊惟茲降鑒若曰專精道周萬物者其神尤功濟生人者其祥大粵若古始肇有君臣巢燧之前寂寞無紀書契而後煥炳可觀若乃鬼神睢盱品彙紛錯性命未正吉凶不定而太昊氏將通其

德則河為之出圖人食未粒鳥獸是茹時不耕稼器無  
耒耜而神農氏將教其本則天為之雨粟蚩尤不道炎  
帝不制銅鐵鑄兵豺狼橫厲而軒轅氏將禁其暴則天  
為之降玄女洪水方割下人昏墊堯德莫能弭其灾舜  
功不能除其害而夏后氏將底其績則洛為之出書自  
茲以還殆三千歲矣其間木火更王雲物告符有若狼  
銜鈎魚躍舟素靈哭黃星見豈不以湯德有慙武善未  
盡漢道既雜魏方亦偏唯以一至之應且為興王之兆

則未有天錫真符聖受明命遠與大禹相續超與上皇比  
宗如我國家之盛者焉洪惟龍池蓋天之所以祚聖即  
今上下居之舊里京師爽塏之所傍無竇澤中忽濫泉  
非常而靈液涓流無幾而神池浸廣榮光休氣若煙若  
雲所未嘗有則此之出清可以鑑而深不見底鱗介瑰  
詭於物其中時莫知其所然日徒見其有異中宗採識  
者之議壓王氣而來遊聖上處或躍之時出飛龍而合  
應臨淄始封也邸第在馬上黨歷試也靈符紹至天其



以是永命我唐圖象丁寧有所底止其若茲也夫成數  
有時而否至理無代而亡固在乎大聖之生乘運而作  
鼓天下之動安天下之危故將順成功自古之啓佑也  
如彼克定多難自天之叶贊也如此初中宗韋氏后黨  
窺隙大盜狃於得志羣慝起而擅權若綴旒然當此時  
也天與若不取鬼謀或不協則我祖宗之業無乃將墜  
而億兆之命亦猶倒懸聖上感之提劍而起雷霆一奮  
袂沴以清內難既衰外虞有謚推戴太上照臨萬邦實

天之為與人更始系皇統維乾綱決綻補壞蕩瑕滌穢  
而乃闕典咸備舊章悉舉處窮盡達在困必通品物資  
以再生寰區為之一變然後返華偽於朴還澆漓於淳  
以大道為原以至仁為根動推是心以御於事人見德  
而興行神享誠而介福故不在於刑罰不在於禱請大  
造裁成玄猷充塞有如陽春播澤觸類皆滋太山起雲  
無遠不徧雖昆蟲草木與蠻貊要荒樂其所生安其所  
習在牛羊而勿踐有干戈而載戢又況於衣冠華夏禮

樂家邦而不刑於斯須不久於漸漬者也夫然何教非  
德何化非經何能事之不舉何醇精之未極周溥洋溢  
於乎緝熙至於太和莫不允若體侔天地之大事出皇  
王之表豈擎跽曲拳盡禮極力將用彥聖不啻其口所  
能稱誦於吾君所可殆庶於至德且往者之有開也天  
感精以降聖聖敬命以奉天此誠有元則欽明文思及  
茲報本必嚴祇齋栗靈慶以屬之神化以答之與初相  
明其徵乃著絲綸先兆非篤信歟由是言之統天者人

合符者聖而差德序命殊尤卓絕豈多乎哉至如古之興王必有所感五帝更尚五運旁通土者黃中之精於金為王水者善利物於土為配苟膺期而有來必合德而為表是則然矣天其或者亦以阜育群化發揮茂祉始告以聖有明徵終成乎帝之神冊因其立象之本會以相乘之數則載代六百歷紀千年變而通之胡可量也宗子宗正卿褒信郡王璆等若干人伯父伯兄仲叔季弟聚族相與詣闕上言天意昭著固已久矣人事符

合亦云至矣而一德是建太階既平靈臺靈沼赫赫明  
明天之為大雖莫能名皇王之鎬豈無頌聲上初克讓  
抑而未許至於累請乃曰俞哉史臣不敏敢獻頌曰  
茫茫元昊載凝載薄在帝庖犧繼天而作浩浩洪水包  
山襄陵舜亦命禹夏氏以興龍圖龜書二王是膺湯武  
已下夫何足徵

右元命

於鑠巨唐乘運而起纘禹之迹系堯之紀五聖在天丕

命曾孫高視河洛同符混元亦有黃龍出於靈沼明明  
穆穆天子之表

右聖德

倬彼東井昭章于天沉精降液下為靈泉靈泉有泚其  
深無底泌之洋洋其甘如醴清德之鑑柔道之體洪源  
濬規實天之啓

右靈泉

濯濯靈泉洞冥皇祇滋液流行化為神池曰止曰行惟

聖之作匪鱸匪鮪惟龍之躍植物斯生動物斯樂天眼  
有見曾是不涸

右神池

靈有休氣紛紛郁郁如山之包如雲之簇潜龍在下瞻  
烏斯屋兆云其吉周爰咨詢既契我龜又叶我人鎬雖  
舊京其命惟新

右休氣

蜿蜿黃龍神池自出靈化恍惚噴雲沃日告帝之符其

儀孔吉或潛于泉或見于田與時順動亦應乎天克配  
我皇無得稱焉

右黃龍

開元紀功德頌并序

臣聞蠻夷猾夏唐虞已然天之所生類不可絕嘗有拓  
境者矣而固也為患或有款塞者矣必也無親是以古  
之哲王審其若此則限以荒服斷非純臣不貢不王武  
功居後不庭不率文德是先三代所以直道百蠻所以



向化迨乎春秋之衰諸侯以力征伐自出戎心大啓謀  
夏亂華干盟偏好王綱弛而若綴天道厭而將革則有  
強能攘劫暴惡交侵雖雜霸之無成亦反經之所取其  
負力者乃塹山堙谷盡境而築長城其黷武者則輓粟  
飛芻窮兵以耗中國又失於下策而悔在末年彼王畧  
之不恢殆千餘載矣夫有其虞而無豫思其患而不圖  
所謂能國將安貴聖物豈終否道非固窮鑒之者昊天  
救之者英主玄命陰騭畀付神武我太宗一戎衣而大

定我皇帝再受命而太平不是古而務文不非今而忘戰以時變而消息與天元而合符日月之所照臨陰陽之所陶冶凡有在地莫不稟朔而東夏郡縣北隰山戎先是四十年侵軼數百里自茲氣奪數以病告既威讓之不恭且力制之不可或朝或否為虺為蛇幽鄣未遑以滅烽邊城安得而弛柝曠日持久兵連禍挈率有事邊是無寧歲二十二年春乃命右羽林大將軍兼御史中丞幽州長史張守珪將中軍都督諸鎮雄名先路夷裔

生風載馳信臣繼發精卒戒嚴有赫張皇若神公卿大  
夫未始測也將校部曲亦莫知也皇帝方日靖以慮之  
乾綱以斷之初決策於九重已收功於萬里矣二十二  
年冬十有二月中貴將命元戎受律三軍疾雷於非時  
二庭喪膽於非意欲遁則衆潰不保欲拒則兵鋒莫當  
因而偽降幸且紓禍遽圖反覆將肆鴟張觀釁先人豈  
伊負我以間諜而情得乘猜携而計從或竒兵以嘗或  
厚利以啗無何變作果自族誅克元惡首鬼惑神誘假

天威而無前覆鳥巢而何有於是諸部大駭率衆復歸  
責以不義之尤捨其不臣之罪既服即序有威且懷載  
籍以來固未之見也昔我睿祖取句驪如拾遺今茲聖  
謀易林胡於反掌獻功有續後嗣無忘百王所廢之勲  
四夷未賓之俗自我底定巍乎登皇其若此也於是彼  
節使與羣帥因東師之凱旋離而族談合而公議以為  
主上憫一隅之苦垂不代之畧以計易戰以兵去兵神  
斷自天虜平不日且軍未血刃敵免膏原密承無方之

謀坐致不陣之捷有征無戰即王者之師歟而不彰美於吾君得無臣子之罪不表聖於帝載曷稱文武之時乃率其屬至於固請帝三讓德而曰俞哉夫曲成萬類者天為而不有下濟兆庶者聖成而不居物無謝生於天雖云至道人無歸功於聖何以最靈雖無已無名所宜絕於言象而惟忠與義固不廢於頌述大雅云徐方既同天子之功又曰明明天子令聞不已其此之謂也臣再拜頓首敢獻頌曰

赫赫天威兮被遐荒蠢茲山戎兮不來王命南仲兮整  
六師出幽陵兮輔九夷簸赤山兮蕩滄海弔無告兮伐  
有罪徒不勤兮車不殆虜震驚兮兵氣倍昔負固兮今  
安在魁自殲兮裔既平謀既集兮聖自明我不戰兮獻  
戎捷俾厥後兮揚天聲

聖應圖贊并序

臣聞啓聖者天也宜有以覺悟受命者聖也必有以明  
徵故神不言而可知時將至而先兆當陛下龍潛上黨

也或託類於雲物或效靈於卜筮天之意者丁寧垂象  
唯恐後時又以潞水之泓深山鹿之捷走馳騎是獲厲  
流不濡非力所能以明或躍乾之上體時在九四神道  
幽贊聖期密邇自後而占何著明其若此盖天福海內  
地降聖跡以瑞非常之后以決如神之策至於再三明  
必信耳有郡掾崔弼時其從行見龍騎先馳謂河流可  
涉亦既數步遽已滅頂不沉也安足以驗飛無凡也於  
何以昭聖事來自久命常惟新臣不勝至願謹為聖圖

遂獻贊曰

龍之或躍泉有可深神亦成象化為背禽凌厲是獲明  
命則忱如彼從掾馬能不沉

開元正厯握乾符頌并序

臣伏見景寅制書以開元厯握乾符垂示天下幸甚其  
沙門玄侶等所言益部耆舊傳洛下閎改顓頊厯推校  
最為精密而曰後八百歲其厯差一日當有聖人定之  
到於今厯果有差聖果有定誠非常之嘉應曠代之靈



符不可得而間也臣誠懼誠喜臣聞天道先聖而啓期  
聖人後天而奉時不當乎天心不在歷數不登乎聖道  
不合元符玄命定而王者應幽數起而明者察故洛下  
闕極其數而知來者舊傳尚其占而示後我皇帝無思  
而感自然玄同僧玄侶等幸會而言豈云素慮非人事  
也非神道也天固已儲祥以俟時積分以差日出入數  
代多歷年所疇人極力不能課其祥上林雜候亦莫徵  
其失則明天意以俟聖期期數未臻乃藏於密聖證將

至如應如響彼幽深之何有此會通之不謀所以下叶  
黃鐘上稽玄象以和六氣以合三光復其見心間不容  
髮斗樞且運而況於人時元氣已調而況於月令於戲  
天下之動日用不知昆蟲草木生者自遂麟鳳龜龍靈  
者自瑞蠻夷戎狄遠無不至山川鬼神幽罔不洎此聖  
人所以定天下之象通天下之志天人之道備也昔者  
河出圖洛出書自時厥後符命非一空文而無應其殆  
乎人為實錄而有徵焉用乎龍負則洛下閎者此其神

乎不然是何見之明也夫聖有時而不作物無聖而不  
覩仲尼感時於鳳鳥古人嘆壽於清河皆傷於不達而  
恨於難見我后受成命重光乎文武累聖而無窮殊祥  
而無數彼哀命者曾不得而朝聞凡今之人誠何幸  
而目覩由是觀之當其來運唐虞之屋可封非其有時  
孔丘之徒不遇也千載之會也萬物豈知其謝生於天  
乎兆人亦云忘力於帝乎微臣荷寵靈揚休命則臣子  
之志在於盡美而惟天之大終莫能名不勝區區敢

獻頌曰

於皇惟后受命于天時來于今兆是厥先既定乃日允  
叶斯年赫赫光明應于上玄

白羽扇賦并序

開元二十四年夏盛暑奉勅使大將軍高力士賜宰臣  
白羽扇某與馬竊有所感立獻賦曰

當時而用在物所長彼鴻鵠之弱羽出江湖之下方安  
知煩暑可致清涼豈無紈素采畫文章復有修竹剖析

毫芒提攜密邇搖動馨香惟衆珍之在御何短翮之敢  
當而竊思於聖后且見持於未央伊昔臯澤之時亦有  
雲霄之志苟效用之得所雖殺身之何忘肅肅白羽穆  
如微風縱秋氣之移奪終感恩於篋中

御批答

朕頃賜扇聊以滌暑卿立賦之且見情素詞高理妙朕  
詳之久矣然佳彼勁翮方資利用與夫棄捐篋笥義不  
當也

荔枝賦并序

南海郡出荔枝焉每至季夏其實乃熟狀甚瓌詭味特  
甘滋百果之中無一可比余往在西掖嘗盛稱之諸公  
莫之知而固未之信唯舍人彭城劉侯弱年累遷經於  
南海一聞斯談倍復嘉歎以為甘旨之極也又謂龍眼  
凡菓而與荔枝齊名魏文帝方引蒲桃及龍眼相比是  
時二方不通傳聞之大謬也每相顧閒議欲為賦述而  
世務卒卒此志莫就及理郡暇日追敘往心夫物以不

知而輕味以無比而疑遠不可驗終然永屈况士有未  
效之用而身在無譽之間苟無深知與彼亦何以異也  
因道揚其實遂作此賦

菓之美者厥有荔枝雖受氣於震方實稟精於火離乃作  
酸於此裔爰負陽以從宜蒙休和之所播涉寒暑而匪虧  
下合圍以擢本傍蔭畝而抱規紫紋紺理黛葉緗枝蒼鬱  
而憲霽環合而琴纒如蓋之張如帷之垂雲煙沃若孔翠  
于斯靈根所盤不高不卑陋下澤之沮洳惡層崖之嶮巖

彼前志之或妄何側生之見疵爾其勾芒在辰凱風入律  
肇允含滋芬敷謐溢綠穗靡靡青英苾苾不豐其華但甘  
其實如有意乎敦本故微文而妙質蒂蒂藥房而攢萃皮龍  
鱗以駢比膚玉英而含津色江萍以吐日朱苞剖明璫出  
罔然數寸猶不可疋未玉齒而殆銷雖瓊漿而可軼彼衆  
味之有五此甘滋之不一伊醇淑之無準非精言之能悉  
聞者歡而竦企見者訝而驚竚心志可以蠲忿口爽可以  
忘疾且欲神於醴露何比數之柑橘援蒲桃以見擬亦



古人之深失若乃華軒洞開嘉賓四會時當燠煜客或  
煩憤而斯果在焉莫不心侈而體忤信雕盤之仙液實  
玳筵之綺績有終食於累百愈益氣而治內故無厭於  
所甘雖不貧而必愛沈美李而莫取浮甘瓜而自退豈  
一座之所榮冠四時之為最夫其貴可以薦宗廟其珍  
可以羞王公亭十里而莫致門九重兮曷通山五嶠兮  
白雲江千里兮清楓何斯美之獨遠嗟爾命之不工每  
被誚於凡口罕獲知於貴躬柿可稱乎梁侯梨何幸乎

張公亦因人之所遇孰能辯乎其中哉

曲江集卷一

欽定四庫全書薈要卷一萬三千五百五十六

集部

曲江集卷二

唐 張九齡 撰

詩

奉和聖製二十七首

樂章二首

和酬諸公詩二十九首

奉和聖製南郊禮畢酺宴

配天昭聖業率土慶輝光春發三條路醑開百戲場流  
恩均庶品縱觀聚康莊妙舞來平樂新聲出建章分曹  
日抱戴赴節鳳歸昌幸奏承雲樂同晞湛露陽氣和皆  
有感澤厚自無疆飽德君臣醉連歌奉栢梁

奉和聖製早渡蒲津關

魏武中流處軒皇問道回長堤春樹發高掌曙雲開龍  
負王舟渡人占仙氣來河津會日月天仗役風雷東顧  
重關盡西馳萬國陪還聞股肱郡元首詠康哉

奉和聖製幸晉陽宮

隋季失天策萬方懼凶殘皇祖稱義旗三靈皆獲安聖  
期將申錫王業成艱難盜移未改命厯在終履端彼汾  
惟帝鄉洪都信鬱盤一月朔巡狩羣后陪清鑿霸迹在  
沛庭舊儀覩漢官唐風思何深舜典敷更寬家蒙枌榆  
復邑爭牛酒歡緬惟剪商後豈獨微禹歎三后既在天  
萬年斯不刊尊祖實我皇天文皆仰觀

奉和聖製同二相南出雀鼠谷

設險諸侯地承平聖主巡東君朝二月南旆擁三辰寒  
出重關盡年隨行漏新瑞雲叢捧日芳樹曲迎春舞詠  
先馳道恩華及從臣汾川花鳥意併奉屬車塵

奉和聖製次成臯先聖禽建德之所

天命誠有集王業初惟艱剪商自文祖夷項在茲山地  
識斬蛇處河臨飲馬間威加昔運往澤流今聖還尊祖  
頌先烈賡歌安用攀紹成即我后封岱出天關

奉和聖製過王濬墓

漢王思鉅鹿晉將在弘農入蜀舉長算平吳成大功與  
渾雖不協歸皓實為雄孤績淪千載流名感聖衷萬乘  
渡荒隴一顧凜生風古節猶不棄今人爭效忠

奉和聖製經孔子舊宅

孔門大山下不見登封時徒有先王法今為明主思思  
加萬乘幸禮致一牢祠舊宅千年外光華空在茲

奉和聖製經河上公廟

昔者河邊叟誰知隱與仙姓名終不識章句此空傳跡

為坐忘晦言猶強著詮精靈竟何所祠宇獨依然道在  
紆宸睠風行動睿篇從茲化天下清淨復何先

奉和聖製賜諸州刺史以題座右

聖人合天德洪覆在元元每勞蒼生念不以黃屋尊興  
化俟羣辟擇賢守列藩得人此為盛咨岳今復存降鑒  
引君道殷勤啓政門容光無不照有象必為言成憲知  
所奉致理歸其根肅肅稟玄猷煌煌戒朱軒豈徒任遇  
重兼爾宴錫繁載聞勵臣節持荅明主恩



奉和聖製瑞雪篇

雜言

萬年春三朝日上御明臺旅庭實初瑞雪兮霏微俄同  
雲兮蒙密此時騷切陰風生先過金殿有餘清信宿嬋  
娟飛雪度能使玉人俱掩嫫皓皓樓前月初白紛紛陌  
上塵皆素昨訝驕陽積數旬始知和氣待迎新匪惟在  
人利曾是扶天意天意豈云遙雪下不崇朝皇清既無  
斲雪委方盈尺草樹紛早榮京坻宛先積君恩誠謂何  
歲稔復人和預數斯箱慶應如此雪多朝冕旒兮載悅

想簞笠兮農節倚瑤琴兮或歌續薰風兮瑞雪福浸昌  
應尤盛瑞雪年年常感聖願以栢梁作長為柳花詠

奉和聖製早發三鄉山行

七言

羽衛森森西向秦山川歷歷在清晨晴雲稍卷寒巖樹  
宿雨能銷御路塵聖德由來合天道靈符即此應時巡  
遺賢一一皆羈致猶欲高深訪隱淪

奉和聖製溫泉歌

雜言

有時神物待聖人去後湯還冷來時樹亦春今茲十月

自東歸羽旆逶迤上翠微  
温谷葱葱佳氣色  
離宮奕奕斗光輝  
臨渭川近天邑  
浴日温泉復在茲  
群仙洞府那相及  
吾君利物心  
玄澤浸蒼黔  
漸漬神湯無疾苦  
薰歌一曲感人深

奉和聖製燭龍齋祭

四言

上帝臨下鑒亦有光  
孰云陰隲惟聖克彰  
六月徂暑四郊讐  
陽我后其勤告于壇  
場精意允溢群靈鼓  
舞蔚兮朝雲沛然時  
雨雨我原田亦既有  
年燭龍煌煌明宗報

祀予以助之天人帝子聞詩有訓國風茲始

奉和聖製喜雨四言

艱我稼穡載育載亨如物應之曷聖與靈謂我何憑惟  
德之馨誰云天遠以誠必至太清無雲羲和頓轡于斯  
蒸人瞻彼匪覲陰冥倏忽霈澤咸洎何以致之我后之  
感無臯無隰黍稷黠黠無卉無木敷芬黠黠黃龍勿來  
鳴鳥不思人和年豐皇心則怡豈與周宣雲漢徒詩

奉和聖製送十道採訪使及朝集使

三年一上計萬國趨河洛課最力已陳賞延恩復博垂  
衣深共理改瑟其咸若首路迴竹符分鑣揚木鐸戒程  
有攸往詔餞無淹泊昭晰動天文殷勤在人瘼持久望  
茲念克終期所託行已當自強春耕庶秋獲

奉和聖製次瓊岳韻

山祇亦望幸雲雨見靈心岳館逢朝霽關門解宿陰咸  
京天上近清渭日邊臨我武因冬狩何言是即禽

奉和聖製送李尚書入蜀

眷言感忠義何有間山川徇節今如此離情空復然皇  
心在勤恤德澤委昭宣周月成功後明年或勞還

奉和聖製初出洛城

東土淹龍駕西人望翠華山川祇詢物宮觀豈為家十  
月迴星斗千官捧日車洛陽無怨思巡幸更非賒

奉和聖製謁元皇帝廟齋

興運昔有感建祠北山巔雲雷初締構日月今悠然紫  
氣尚翕鬱玄元如在馬迨茲事追遠輪奐復增鮮洞府

香林處齋壇清漢邊吾君乃尊祖夙駕此留連樂動人  
神會鍾成律度圓笙歌下鸞鶴芝朮萃靈仙曾是福黎  
庶豈惟味虛玄賡歌徒有作微薄謝昭宣

南郊文武出入舒和之樂

四言樂章

祝史辭正人神慶叶福以德昭享以誠接六變云備百  
禮斯浹祀事孔明祚流萬葉

奉和聖製龍池篇

天啓神龍生碧泉泉水靈源浸迤延飛龍已向珠潭出

積水仍將銀漢連岸傍花柳看勝畫浦上樓臺問是仙  
我后元符從此得方為萬歲壽圖川

南郊太尉酌獻武舞作凱安之樂

樂章

馨香惟后德明命光天保肅祀崇聖靈陳信表皇道玉  
戚初蹈厲金匏既靜好介福何穰穰精誠格穹昊

奉和聖製送尚書燕國公赴朔方

宗臣事有征廟算在休兵天與三台座人當萬里城朔  
南方偃革河右整揚旌寵錫從仙禁光華出漢京山川



勤遠畧原隰軫皇情為奏薰琴唱仍題寶劍名聞風六  
郡伏計日五戎平山甫歸應疾留侯功復成歌鐘旋可  
望衽席豈難行四牡何時入吾君憶履聲

奉和聖製途經華山

萬乘華山下千巖雲漢中靈居雖突密睿覽忽玄同日  
月臨高掌神仙仰大風攢峯勢岌岌翊輦氣雄雄揆物  
知幽贊銘勲表聖衷會應陪檢玉來此告成功

奉和聖製早登太行山率爾言志

孟月攝提貞乘時我后征晨嚴九折度暮戒六軍行日  
御馳中道風師卷太清戈鋌林表出組練雪間明動植  
希皇豫高深奉睿情陪遊七聖列望幸百神迎氣色煙  
猶喜恩光草尚榮之罍稱萬歲今此復同聲

奉和聖製登封禮畢洛城酺宴

大君畢能事端宸樂成功運與千齡合懽將萬國同漢  
酺歌聖酒韶樂舞薰風河洛榮光遍雲煙喜氣通春華  
頓覺早天澤倍知崇草木皆沾被猶言不在躬

奉和聖製經函谷關作

函谷雖云險黃河復已清  
聖心無所隔空此置關城

奉和聖製渡潼關口號

隱嶙故城壘荒涼空戍樓  
在德不在險方知王道休

奉和吏部崔尚書雨後大明朝堂望南山

迢遞終南頂朝朝閭闔前  
謁來青綺外高在翠微先  
雙鳳寨為闕群龍儼若仙  
還知到玄圃更是謁甘泉  
夜雨塵初滅秋空月正懸  
詭容紛入望霽色宛成妍  
東極華

陰踐西彌嶓冢連奔峯出嶺外瀑水落雲邊漢帝宮將  
苑商君陌與阡林華鋪近甸煙靄遠晴川既庶仁斯及  
分憂政已宣山公啓事罷吉甫頌聲傳濟濟金門步洋  
洋玉樹篇徒歌雖有屬清越豈同年

和黃門盧監望秦始皇陵

秦帝始求仙驪山何遽卜中年既無效茲地所宜復徒  
役如雷奔玆怪亦雲蓄黔首無寄命赭衣相馳逐人怨  
神亦怒身死宗遂覆土崩失天下龍關入函谷國為項

籍屠君同華元戮始掘既由楚終焚乃因牧上宰議楊  
賢中阿感桓速一聞過秦論載懷空杼軸

蘇侍郎紫微庭各賦一物得芍藥

仙禁生紅藥微芳不自持幸因清切地還遇艷陽時名  
見桐君錄香聞鄭國詩孤根若可用非直愛華滋

和崔黃門寓直夜聽蟬之作

蟬嘶玉樹枝向夕惠風吹幸入連宵聽應緣飲露知思  
深秋欲近聲靜夜相宜不是黃金飾清香徒爾為

和姚令公從幸溫湯喜雪

萬乘飛黃馬，千金狐白裘。  
正逢銀霰積，如向玉京遊。  
瑞色鋪馳道，花文拂綵旒。  
還聞吉甫頌，不共郢歌儔。

和秋夜望月憶韓廣等諸侍郎因贈李林甫

秋天碧雲夜，明月懸東方。  
皓皓庭際色，稍稍林下光。  
桂華澄遠近，璧綵散池塘。  
鴻鴈飛難度，闕山曲易長。  
揆予秉孤直，虛薄忝文昌。  
握鏡慙先照，持衡愧後行。  
多才衆君子，載筆久辭場。  
作賦推潘岳，題詩許謝康。  
當時陪宴

語今夕恨相忘願欲接高論清晨朝建章

和吏部李侍郎見示秋夜望月憶諸侍郎之什  
其卒章有前後行之戲因命僕繼作

清秋發高興涼月復閒宵光逐露華滿情因水鏡搖同  
持亦所見異路無相招美景向空盡懽言隨事銷忽聽  
金華作誠如玉律調南宮尚為後東觀何其遠名數雖  
云隔風期幸未遙今來重餘論懷此更終朝

和崔尚書喜雨

積陽雖有晦經月未為災上念人天重先祈雲漢迴仁  
心及草木號令起風雷照爛陰霞上交紛瑞雨來三辰  
破黍稷四達屏氛埃池溜因添滿林芳為灑開聽中聲  
滴瀝望處影徘徊惠澤成豐歲昌言發上才無論驗石  
鼓不是御雲臺直頌皇恩浹崇朝遍九垓

和王司馬折梅寄京邑昆弟

離別念同嬉方榮欲共持獨攀南國樹遙寄北風時林  
惜迎春早花愁去日遲還聞折梅處更有棣華詩



和許給事直夜簡諸公

未央鍾漏晚仙宇藹沉沉武衛千廬合嚴扃萬戶深左  
掖知天近南窻見月臨樹搖金掌露庭徙玉樓陰他日  
聞更直中宵屬所欽聲華大國寶夙夜近臣心逸興乘  
高閣雄飛在禁林寧思竊抃者情發為知音

和裴侍中承恩拜掃旋轡途中有懷寄州縣官  
寮鄉園故親

嵩岳神惟降汾川鼎氣雄生才作霖雨繼代有清通天

下稱賢相朝端挹至公自家來佐國移孝入為忠霜露  
多前感丘園想舊風扈巡過晉北問俗到河東便道恩  
華降還鄉禮教崇野樽延故老朝服見兒童

闕

和姚令公哭李尚書

貴賤雖殊等平生竊下風雲泥勢已絕山海納還通忽  
歎登龍者翻將弔鶴同琴詩猶可託劍履獨成空疇昔  
嘗論禮興言每匪躬人思崔琰議朝掩祭遵公作善神  
何酷依仁命不融天文虛北斗人事罷南宮上宰既傷

舊下流迷感衷無恩報國士徒欲問玄穹

張丞相與余有孝廉校理之舊又代余為荊州  
故有此贈

漢上登飛幟荆南歷舊居已嘗臨砌橘更觀躍池魚威  
德繼微渺深衷能卷舒義申蓬閣際情坦廟堂初郡挹  
文章美人懷燮理餘皇恩儻照亮豈厭承明廬

酬宋使君作

時來不自意宿昔謬樞衡翊聖負明主妨賢媿友生罷

歸猶右職待罪尚南荆政有留棠舊風因繼祖成高軒  
問疾苦蒸庶荷仁明哀廢時所薄祇言僚故情

酬通事舍人寓直見示篇中兼起居陸舍人景  
獻

軒掖殊清秘才華固在斯興因膏澤灑情與惠風吹所  
美應人譽何私亦我儀同聲感喬木比翼謝長離價以  
陸生減賢慙鮑叔知薄遊嘗獨愧芳訊乃兼施此夜金  
閨籍伊人瓊樹枝飛鳴復何遠相顧幸媿媿

和黃門盧侍郎詠竹

清切紫庭垂歲蕤  
防露枝色無玄月  
變聲有惠風吹高  
節人相重虛心世  
所知鳳凰佳可食  
一去一來儀

和蘇侍郎小園夕霽寄諸弟

清風閭闔至軒蓋  
承明歸雲月愛秋  
景林堂開夜扉何  
言兼濟日尚與宴  
私違興屬蒹葭變  
文因棠棣飛人倫  
用忠厚帝德已光  
輝贈弟今為貴方  
知陸氏微

和韋尚書答梓州兄南亭宴集

棠棣聞餘興烏衣有舊遊門前杜城陌池上曲江流暇  
日嘗繁會清風詠阻修始知西峙嶽同氣此相求

陸平原  
贈弟有

子為東峙

嶽之句

與袁補闕尋蔡拾遺會此公出行後蔡有五韻

詩見贈以此篇答焉

轍迹陳家巷詩書孟子鄰偶來乘興者不值草玄人契  
是忘年合情非累日深聞君還薄暮見春及茲辰贈我  
如瓊玖將何報所親

酬趙二侍御使西軍贈兩省舊僚

石室先鳴者金門待制同操刀嘗願割持斧竟稱雄應  
敵兵初起緣邊虜欲空使車經隴月征旆繞河風忽枉  
兼金訊非徒秣馬功氣清蒲海曲聲滿栢臺中顧已塵  
華省欣君震遠戎明時獨匪報嘗欲退微躬

答陳拾遺贈竹簪

與君嘗此志因物復知心遺我龍鍾節非無玳瑁簪幽  
素宜相重雕華豈所任為君安首飾懷此代兼金

答太常靳博士見贈一絕

上苑春先入中園花盡開唯餘幽徑草尚待日光催

酬宋使君見貽

陟隣初稟訓獻策幸逢時朝列且云忝君恩復若茲庭  
闈際海曲軺傳荷天慈顧已歡烏鳥聞君泣素絲才明  
應主召福善豈神欺但願白心在終然涅不緇

武司功初有幽庭春暄見詒夏首獲見以詩報

馬



芳月盡離居幽懷重起予雖言春事晚尚想物華初  
遲日暎方照高齋澹復虛筍成林向密花落樹應踈  
贈鯉情無間求鶯思有餘暄妍不相待含歎欲焉如

贈澧陽韋明府

君有百鍊刃堪斷七重犀誰開太阿匣持割武城雞  
竟與尚書佩還應天子提何時遇操宰當使玉如泥

酌周判官巡至始興會改秘書少監見貽之作

兼呈耿廣州

惟昔遷樂土迄今已重世陰慶荷先德素風慙後裔唯  
益梓桑恭豈稟山川麗干時初自勉揆已無兼濟瘠土  
資勞力良書啓蒙蔽一探石室文再擢金門第既起南  
宮草復掌西掖制過舉及小人便蕃在中歲亞司河海  
秩轉牧江湖滢勿謂符竹輕但覺涓塵細一麾尚云忝  
十駕宜求稅心息已如灰跡牽且為贅忽奉天書委將  
革海隅弊朝聞循誠節夕飲蒙瘴厲義疾恥無勇盜憎  
攻亦銳葵藿是傾心豺狼何返噬履險甘所受勞賢惡

相曳攬轡但荒服循垓便私第嘉慶始獲申恩華復相  
繼無庸我先舉同事君猶滯當推奉使節且結拜親契  
更延懷安旨曾是慮危際善謀雖若茲至理焉可替所  
仗有神道况承明主惠

在洪州答綦母學士

旬雨不愆期由來自若時爾無言郡政吾豈欲天欺常  
念消塵益惟懼草樹滋課成非所擬人望在東菑

酬王六霽後書懷見示

雲雨俱行罷江天已洞開炎氛霽後滅邊緒望中來作  
驥君垂耳為魚我曝鰓更憐湘水賦還是洛陽才

酬王六寒朝見貽

賈生流寓日揚子寂寥時在物多相背唯君獨見思漁  
為江上曲雪作郢中詞忽枉兼金訊長懷伐木詩

酬王履震遊園林見貽

宅生惟海縣素業守郊園中覽霸王說上徼明主恩一  
行罷蘭筵數載歷金門既負潘生拙俄從周任言逶迤

戀軒陞蕭散反丘樊舊徑稀人跡前池耗水痕併看芳  
樹老唯覺弊廬存自我棲幽谷逢君翳覆盆孟軻應有  
命賈誼得無冤江上傷行遠林間偶避喧地偏人事絕  
時霽鳥聲繁獨善心俱閉窮居道共尊樂因南澗藻憂  
豈北堂萱幽意加投漆新詩重贈軒平生徇知己窮達  
與君論

曲江集卷二

欽定四庫全書薈要卷一萬三千五百五十七

集部

曲江集卷三

唐 張九齡 撰

詩

登南岳事畢謁司馬道士

將命祈靈嶽迴策詣真士絕跡尋一徑異香聞數里分  
庭八桂樹肅容兩童子入室希把袖登床願啟齒誘我  
弃智訣迨茲長生理吸精反自然鍊藥求不死斯言眇

霄漢顧子嬰紛滓相去九牛毛慙嘆知何已

登樂遊原春望書懷

城隅有樂遊表裏見皇州策馬既長遠雲山亦悠悠萬  
壑清光滿千門喜氣浮花間直城路草際曲江流憑眺  
茲為美離居方獨愁已驚玄髮換空度綠萋柔奮翼籠  
中鳥歸心海上鷗既傷日月逝且欲桑榆收豹變焉能  
及鶯鳴非可求願言從所好初服返林丘

登襄陽恨峴山



昔年亟攀踐征馬復來過信若山川舊誰如歲月何蜀  
相吟安在羊公碣已磨令圖猶寂寞嘉會亦蹉跎宛宛  
樊城岸悠悠漢水波逶迤春目遠感寄客情多地本原  
林秀朝來煙景和同心不同賞留歎此巖阿

九月九日登龍山

郡庭常窘束涼野求昭曠楚客凜秋時桓公舊臺上清  
明風日好歷落江山望極遠何蕭條中留坐惆悵東彌  
夏口闊西拒荆門壯夷險雖異時古今豈殊狀先賢眇

不接故老猶可訪投弔傷昔人揮金感前匠自為本踈  
散未始忘幽尚際會非有欲往來是無妄為邦復多幸  
去國殊遷放且泛籬下菊還聆郢中唱灌園亦何為於  
陵乃逃相

三月三日登龍山

伊川與霸津今日被除人豈似龍山上還同湘水濱衰  
顏憂更老淑景望非春襍飲豈吾事聊將偶俗塵

晚霽登王六東閣

試上江樓望初逢山雨晴連空青嶂合向晚白雲生彼  
美要殊觀蕭條見遠情情來不可極日暮水流清

登郡城南樓

閉閣幸無事登樓聊永日雲霞千里開州渚萬形出澹  
澹澄江漫飛飛度鳥疾邑人半艫艦津樹多楓橘感別  
時已屢憑眺情非一遠懷不我同孤興與誰悉平生本  
單緒邂逅承優秩謬忝為邦寄多慙理人術駕鉛雖自  
勉倉廩素非實陳力儻無效謝病從芝朮

金 卷三  
歲初巡屬縣登高安南樓言懷

山城本孤峻憑高結層軒江氣偏宜早林英粲已繁餘  
滋含宿霽衆妍在朝暎拂衣釋簿領伏檻遺紛喧深俯  
東溪澳遠延南山樊歸雲納前嶺去鳥投遙村目盡有  
餘意心惻不可諉竭來彭蠡澤載經敷淺原春及但生  
思時哉無與言不才叨過舉唯力酬明恩美化猶寂蔑  
迅節徒飛奔雖無立成效庶以去思論行復徇孤迹亦  
云吾道存

登樓望西山

城樓枕南浦日夕顧西山宛宛鸞鶴處高高煙霧間  
仙井今猶在洪崖久不還金編誰我授羽駕亦難攀  
簷際千峯遠雲中一鳥閒縱觀窮水國遊思遍人寰  
勿復塵埃事歸來且閉關

候使石頭驛樓

山檻憑高望川途眇北流遠林天翠合前浦日華浮  
萬井緣津渚千艘咽渡頭漁商多末事耕稼少良疇  
自守

陳蕃榻嘗登王粲樓徒然騁目處豈是獲心遊向跡雖  
愚谷求名亦盜丘息陰芳木所空復越鄉憂

登荊州城樓

天宇何其曠江城坐自拘層樓百餘尺迢遞在西隅暇  
日時登眺荒郊臨故都累累見陳迹寂寂想雄圖古往  
山川在今來郡邑殊北疆雖入鄭東距豈防吳幾代傳  
荆國當時敵陝郭上流空有處中土復何虞枕席夷三  
峽關梁豁五湖承平無異境守隘莫論夫自罷金門籍

來叅竹使符端居向林藪微尚在桑榆直似王陵慙非  
如甯武愚今茲對南浦垂雁與雙鳧

登荊州城望江

滔滔大江水天地相終始經閱幾世人復歎誰家子東  
望何悠悠西來晝夜流歲月既如此為心那不愁

秋晚登樓望南江入始興郡路

潦收沙衍出霜降天宇晶伏檻一長眺津途多遠情思  
來江山外望盡煙雲生滔滔不自辨役役且何成我來

颯衰鬢孰云飄華纓樞馬苦蹉跎籠禽念遐征歲陰向  
晚晚日夕空屏營物生貴得性身累由近名內顧覺今  
是追歎何時平

登臨沮樓

高深不可厭巡屬復來過本與衆山絕况茲韶景和危  
樓入水倒飛檻向空摩雜樹綠青壁樛枝掛綠蘿潭清  
能徹底魚樂好跳波有象言難具無端思轉多同懷不  
在此孤賞欲如何



登古陽雲臺

庭樹日衰颯風霜未云已  
駕言遣憂思乘興求相似  
楚國茲故都蘭臺有餘址  
傳聞襄王世仍立巫山祀  
方此全盛時豈無嬋娟子  
色荒神女至魂蕩宮觀啟  
蔓草今如積朝雲為誰起

陪王司馬登薛公道遙臺

常聞薛公淚非直  
雍門琴竄遂留遺  
跡悲涼見此心  
府中因暇豫江上幸招尋  
人事已成古風流  
獨至今閒情

多感歎清景暫登臨無復甘棠在空餘蔓草深晴光送  
遠目勝氣入幽襟水去朝滄海春來換碧林賦懷湘浦  
弔碑想漢川沈曾是陪遊日徒為梁甫吟

賀給事嘗詣蔡起居郊館有詩因命同作

記言聞直史築室面層阿豈不承明入終云幽意多沈  
冥高士致休澣故人過前嶺游氛滅中林芳氣和茲辰  
阻佳趣望美獨如何

常與大理丞袁公太府丞田公偶詣一所林沼

尤勝因並坐其次相得甚歡遂賦詩焉以詠其  
事

方駕與吾友同懷不異尋偶逢池竹處便會江湖心夏  
近林方密春餘水更深清華兩輝映閒步亦窺臨蘋藻  
復佳色鳧鷖亦好音韶芳媚洲渚蕙氣襲衣襟蕭散皆  
為樂徘徊從所欽謂子成夙志歲晚共抽簪

與生公尋幽居處

同方入厭俗相與事遐討及此雲山去窅然巖徑好疑

入武陵源如逢漢陰老清諧欣有得幽閒歛盈抱我本  
玉階侍偶訪金仙道茲焉求卜築所過皆神造歲晚林  
始敷日晏崖方杲不種緣嶺竹豈植臨潭草即途可淹  
留隨目成黼藻期為靜者說曾是終焉保今為簡書畏  
祇令歸思浩

與生公遊石窟山

探秘孰云遠忘懷復爾同日尋高深意宛是神仙中躋  
險邁靈室詭制非人功潛洞黝無底殊庭忽似夢豈如

武安鑿自若茅山通造物良有寄嬉遊迺愜衷猶希咽  
玉液從此昇雲空咄咄共攜手冷然且馭風

林亭詠

穿竹非求麗幽閒欲寄情偶懷因壤石真意在蓬瀛苔  
益山文古池添竹氣清從茲果蕭散無事亦無營

郡舍南有園畦雜樹聊以永日

為郡久無補越鄉空復深苟能秉素節安用叨華簪却  
步園畦裏追吾野逸心形骸拘俗吏光景賴閒林內訟

誠知止外言猶匪忱成蹊謝李徑衛足感葵陰榮達豈  
不偉孤生非所任江城何寂歷秋樹亦蕭森下有北流  
水上有南飛禽我願從歸翼無然坐自沈

臨泛東湖時任洪州

郡庭日休暇湖曲邀勝踐樂職在中和虛心挹上善乘  
流坐清曠舉目眺悠緬林與西山重雲因北風卷晶明  
晝不逮陰影鏡無辨晚秀復芬敷秋光更遙衍萬族紛  
可佳一遊豈能展羈孤忝邦牧顧已非時選長公世不

容長孺心亦褊永念出籠繫常思退疲蹇歲徂風露嚴  
日恐蘭若翦佳辰不可得良會何其鮮罷興還江城閉  
關聊自遣

始興南山下有林泉常卜居焉荊州卧病有懷  
此地

出處各有在何者為陸沈幸無迫賤事聊可祛迷襟世  
路少夷坦孟門未嶮嶮多慙入火術常惕履冰心一跌  
不自保萬全焉可尋行行念歸路眇眇惜光陰浮生如

過隙先達已吾箴敢忘丘山施亦云年病侵力衰在所  
養時謝良不任但憶舊棲息願言遂窺臨雲間目孤秀  
山下面清深蘿葛自為幄風泉何必琴歸此老吾老還  
當日千金

高齋閒望言懷

高齋復晴景延眺屬清秋風物動歸思煙林生遠愁紛  
吾自窮海薄宦此中州取路無高足隨波適下流歲華  
空冉冉心曲且悠悠坐惜芳時晏胡然久滯留



與弟遊家園

定省榮君賜來歸是晝遊林鳥飛舊里園菓釀新秋枝  
長南庭樹池連北澗流星霜屢爾別蘭麝為誰幽善積  
家方慶恩深國未酬棲棲將義動安得久情留

郡內閒齋

郡閣晝常掩庭蕪日復滋簷風落鳥毳窗葉掛蟲絲拙  
病宦情少羈閒秋氣悲理人無異績為郡但經時惟有  
江湖意沈冥空在茲

晨出郡舍林下

晨興步北林蕭散一開襟復見林上月娟娟猶未沈片  
雲自孤遠叢篠亦清深無事由來貴方知物外心

司馬崔頌和

優閒表政清林薄賞秋成江上懸曉月往來虧復盈天  
雲抗直意郡閣晦高名坐嘯應無欲寧辜濟物情

晨坐齋中偶而成詠

寒露潔秋空遙山紛在矚孤頂乍脩聳微雲復相續人

茲賞地遍鳥亦愛林旭結念憑幽遠撫躬曷羈束仰霄  
謝逸翰臨路嗟疲足徂歲方睽攜歸心亟躑躅休閒儻  
有素豈負南山曲

園中時蔬盡皆鋤理惟秋蘭數本委而不顧彼  
雖一物有足悲者遂賦二章

場藿已成歲園葵亦向陽蘭時獨不偶露節漸無芳  
異菁為畜甘非蔗有漿人多利一飽誰復惜馨香

幸得不鋤去孤苗守舊根無心羨旨蓄豈欲近名園  
遇

賞寧充佩為生莫礙門幽林芳意在非是為人論

城南隅山池春中田袁二公盛稱其美夏首獲  
賞果會夙言故有此詠

憶昨聞佳境駕言尋昔蹊非惟初物變亦與舊遊睽幽  
渚為君說清晨即我攜逢深獨睥睨歷險共攀躋林笋  
苞青穉津楊委綠萸荷香初出浦草色復緣堤樂處將  
鷗狎譚端用馬齊且言臨海郡兼話武陵溪異壤風煙  
絕空山巖徑迷如何際朝野從此待金閨

林亭寓言

林居逢歲晏，遇物使情多。  
衡宦不時與，芬榮奈汝何。  
更憐籬下菊，無如松上蘿。  
因依自有命，非是隔陽和。

南山下舊居閒放

祇役已云久，乘閒返服初。  
塊然屏塵事，幽獨坐林間。  
清曠前山遠，紛喧此地踈。  
喬木凌青靄，脩篁媚綠渠。  
耳和繡翼鳥，目暢錦鱗魚。  
寂寞心還閉，飄颻體自虛。  
興來命旨酒，臨罷閱仙書。  
但樂多幽意，寧知有毀譽。  
尚想爭名

者誰云要路居都忘下流歎傾奪竟何如

感遇

蘭葉春葳蕤桂花秋皎潔欣欣似生意自爾為佳節誰  
知林棲者聞風坐相悅草木有本心何求美入折

幽林歸獨卧滯慮洗孤清持此謝高鳥因之傳遠情日  
夕懷空意人誰感至精飛沈理自隔何所慰吾誠

魚遊樂深池鳥棲欲高枝差爾蜉蝣羽薨薨亦何為有  
生豈不化所感奚若斯神理日微滅吾心安得知浩歎

楊朱子徒然泣路歧

孤鴻海上來池潢不敢顧側見雙翠鳥巢在三珠樹矯  
矯珎木巔得無金丸懼美服患人指高明逼神惡今我  
遊冥冥弋者何所慕

吳越數千里夢寐今夕見形骸非我親衾枕即鄉縣化  
蝶猶不識川魚安可羨海上有仙山歸期覺神變

西日下山隱北風乘夕流燕雀感昏旦簷楹呼足儔鴻  
鵠雖自遠哀音非所求貴人弃疵賤下士嘗殷憂衆情

累外物恕已忘內修感歎長如此使我心悠悠

江南有丹橘經冬猶綠林豈伊地氣暖自有歲寒心可  
以薦嘉客奈何阻重深運命推所遇循環不可尋徒言  
樹桃李此木豈無陰

永日徒離憂臨風懷寒脩美人何處所孤客空悠悠青  
鳥跂不至朱鬣誰云浮夜分起躑躅時逝曷淹留

抱影吟中夜誰聞此歎息美人適異方庭樹含幽色白  
雲愁不見滄海飛無翼鳳凰一朝來竹花斯可食



漢上有游女求思安可得袖中一札書欲寄雙飛翼冥  
冥愁不見耿耿徒緘憶紫蘭秀空蹊皓露奪幽色馨香  
歲欲晚感歎情何極白雲在南山日暮長太息

我有異鄉憶宛在雲溶溶憑此目不覩要之心所鍾但  
欲附高鳥安敢攀飛龍至精無感遇悲惋填心曾歸來  
扣寂寞人願天豈從

閉門躋群化憑林結所思嘯歎此寒木疇昔迺芳蕤朝  
陽鳳安在日暮蟬獨悲浩思極中夜深嗟欲待誰所懷

誠已矣既往不可追鼎食非吾事雲仙嘗我期胡越方  
杳杳車馬何遲遲天壤一何異幽嘿卧簾帷

當塗界寄裴宣州

故人宣城守亦在江南偏如何分虎竹相與間山川  
章綬胡為者形骸非自然含情津渡闊倚望脰空延遠近  
聞佳政平生仰大賢推心徒有屬會面良無緣日夕遵  
前渚江村投暮煙念行祇意默懷遠豈言宣委曲風波  
事難為尺素傳

敬酬當塗界留贈宣州刺史裴耀卿

茂先實王佐，仲舉信時英。  
氣覩衝天發，人將下榻迎。  
珪符肅有命，江國遠徂征。  
九派期方越，千鈞或可輕。  
高帆出風迥，孤嶼入雲平。  
遙嗟于役離，憂空自情飭。  
簪陪早歲接，壤厠專城曠。  
別心彌軫宏，規義轉傾徒。  
然恨飢渴，況乃諷瑤瓊。

再酬使風見示刺史裴耀卿

茲地五湖隣，艱哉萬里人。  
驚飈翻是託，危浪亦相因。  
宣

室才華子金閨諷議臣承明有三入去去速歸輪

曲江集卷三

謹案卷一第二頁後一行則未有天錫真符刊本  
脫天字據唐文粹增

第二頁後三行今上下居之舊里刊本里訛真中  
忽濫泉刊本忽訛勿據唐文粹改

第二頁後五行清可以鑑按唐文粹清上有雖字  
第三頁前四行克定多難刊本克訛充據唐文粹  
改

第四頁後三行於金為王又於土為配按唐文粹

王作母配作妃

第十四頁後四行膚玉英而含津刊本膚訛慮據  
賦彙改

第十五頁前一行亦古人之深失刊本失訛疾若  
乃華軒洞開刊本華訛卑並據賦彙改

卷二第七頁後八行河右暨揚旌刊本右訛陽據  
全唐詩改

第八頁前三行衽席豈難行刊本衽訛枕據全唐

詩改

第九頁後二行漢帝宮將苑刊本苑訛苑據全唐

詩改

卷三第一頁後一行慙嘆知何已按唐文粹作慙

嘆荷知已

第三頁後三行伏檻遺紛喧刊本檻訛濫據全唐

詩改


第五頁前七行津途多遠情刊本遠訛望據全唐

詩改

第十二頁後五行滯慮洗孤情刊本慮訛虛據全

唐詩改





總校官庶吉士 臣張能照

校對官修撰 臣吳錫齡

校對官庶吉士 臣戴心亨

謄錄監生 臣高毓英

謄錄舉人 臣孫潢

欽定四庫全書薈要

集部

曲江集卷八

四至

詳校官助教臣常循



欽定四庫全書薈要卷一萬三千五百五十八

集部

曲江集卷四

唐 張九齡 撰

餞王尚書出邊

漢相推人傑殷宗伐鬼方還聞出將重坐見即戎良上  
策應為豫中權且用光令申兵氣倍威憺虜魂亡樹比  
公孫大城如道濟長夏雲登隴首秋露抵遼陽武德舒



宸睠文思饒樂章感恩身既許激節膽猶嘗祖帳傾朝  
列軍麾駐道傍詩人何所詠尚父欲鷹揚

送趙都護赴安西

將相有更踐簡心良獨難遠圖嘗畫地超拜乃登壇戎  
即崑山叙車同渤海單義無中國費情必遠人安他日  
文兼武而今粟且寬自然來月窟何用刺樓蘭南至三  
冬晚西馳萬里寒封侯自有處征馬去嘽嘽

送使廣州

家在湘源住君今海嶠行經過中正道相送倍為情心  
逐書郵去形隨世網嬰因聲謝遠別緣義不緣名

送姚評事入蜀各賦一物得卜肆

蜀巖化已久沈冥空所思嘗聞賣卜處猶憶下簾時驅  
傳應經此懷賢儻問之歸來說往事歷歷偶心期

送竇校書見餞得雲中辨江樹

江水連天色無涯淨野氛微明岸傍樹凌亂渚前雲舉  
棹形隨轉登艫意漸分渺茫從此去空復惜離羣

餞王司馬入計同用洲字

元寮行上計舉餞出林丘  
忽望題輿遠空思解榻遊別  
筵鋪柳岸征棹倚蘆洲  
獨歎湘江水朝宗向北流

東湖臨泛餞王司馬

南土秋雖半東湖草未黃  
聊乘風日好來泛芰荷香  
蘭棹每勞速菱歌不厭長  
忽懷京洛去難與共清光

餞濟陰梁明府各探一物得荷葉

荷葉生幽渚芳華信在茲  
朝朝空此地采采欲因誰  
但

恐星霜改還將蒲稗衰懷君美人別聊以贈心期

餞陳學士還江南同用徵字

荷篠旋江澳銜杯餞霸陵別前林鳥息歸處海煙凝風  
土鄉情接雲山客念憑聖朝巖穴選應待鶴書徵

通化門外送別

屢別容華改長愁意緒微義將私愛隔情與故人歸薄  
官無時賞勞生有事機離魂今夕夢先繞舊林飛

送楊道士往天台

鬼谷還成道天台去學仙行應松子化留與世人傳此  
地煙波遠何時羽駕旋當須一把袂城郭共依然

送楊府李功曹

平生屬良友結綬望光輝何知人事拙相與官情非別  
路穿林盡征帆際海歸居然已多意況復兩鄉違

送宛句趙少府

解巾行作吏樽酒謝離居脩竹含清景華池澹碧虛地  
將幽興愜人與舊遊踈林下紛相送多逢長者車



送韋城李少府

送客南昌尉離亭西候春  
野花看欲盡林鳥聽猶新  
別酒青門路歸軒白馬津  
相知無遠近萬里尚為鄰

送蘇主簿赴偃師

我與文雄別胡然邑吏歸  
賢人安下位鷲鳥欲早飛  
激節輕華冕移官徇綵衣  
羨君行者樂從此拜庭闈

送廣州周判官

海郡雄蠻落津亭壯越臺  
城隅百雉映水曲萬家開  
里

樹枕榔出時禽翡翠來觀風猶未盡早晚使車迴

別鄉人南還

橘柚南中暖桑榆北地陰何言榮落異因見別離心吾  
亦江鄉子思歸夢寐深聞君去水宿結思渺雲林牽綴  
從浮事遲迴謝所欽東南行舫遠秋浦念猿吟

郡南江上別孫侍御

雲嶂天涯盡川途海縣窮何言此地僻忽與故人同身  
負邦君弩情紆御史驄王程不我駐離思逐秋風

奉酬洪州江上見贈監察御史孫翊

受命讞封疆逢君牧豫章於焉審虞芮復爾共舟舫  
別秋陰盡懷歸客思長江臯枉離贈持此慰他鄉

江上遇疾風

疾風江上起鼓怒揚煙埃白晝晦如夕洪濤聲若雷  
投林鳥鍛羽入浦魚曝鰓瓦飛屋且發帆快檣已摧  
不知天地氣何為此喧逐

初發江陵有懷

極望涔陽浦江天渺不分扁舟從此去鷗鳥自為羣他  
日懷真賞中年負俗紛適來果微尚倏爾會斯文復想  
金閨籍何如夢渚雲我行多勝寄浩思獨氛氲

自豫章南還江上作

歸去南江水磷磷見底清轉逢空闊處聊洗滯留情浦  
樹遙如待江鷗近若迎津途別有趣況乃濯吾纓

道逢北使題贈京邑親知

征騾稍靡靡去國方遲遲路遶南登岸情搖北上旗故

人憐別日旅鴈逐歸時  
歲晏無芳草將何寄所思

江上使風呈裴宣州

江路與天連風帆何淼然  
遙林浪出沒孤舫鳥聯翩  
常自千鈞重深思萬事捐  
報恩非徇祿還逐賈人船

谿行寄王震

山氣朝來爽谿流日向清  
遠心何處愜閒棹此中行  
叢桂林間待群鷗水上迎  
徒然適我願幽獨為誰情

將至岳陽有懷趙二

湘浦多深林青冥晝結陰獨無謝客賞況復賈生心草  
色雖云發天光或未臨江潭非所遇為爾白頭吟

南陽道中作

登郢屬歲陰及宛惜所適復聞東漢主遺此南都迹佳  
氣藹厥初霸圖紛在昔茲邦稱貴近與世嘗薰赫遭遇  
感風雲變衰空草澤不識鄧公樹猶傳陰后石驅馬歷  
闔閭荆榛翳阡陌事去物無象感來心不懌懷古對窮  
秋興言傷遠客眇默遵歧路辛勤弊行役雲鴈號相呼

林麝走自索，顧憶徇書劍。未嘗安枕席，豈暇墨突黔。空持遼豕白，迷復期非遠。歸與賞農隙。

西江夜行

遙夜人何在，澄潭月裏行。悠悠天宇曠，切切故鄉情。外物寂無擾，中流澹自清。念歸林葉換，愁坐露華生。猶有汀洲鶴，宵分乍一鳴。

使還湘水

歸舟宛何處，正值楚江平。夕逗煙村宿，朝緣浦樹行。于

役已彌歲言旋今愜情鄉郊尚千里流目夏雲生

初發道中寄遠

日夜鄉山遠秋風復此時舊聞胡馬思今聽楚猿悲念  
別朝昏苦懷歸歲月遲壯圖空不息常恐髮如絲

湘中作

湘流繞南嶽絕目轉青青懷祿未能已瞻途屢所經煙  
嶼宜春望林猿莫夜聽永路日多緒孤舟天復冥浮役  
從此去嗟嗟勞我形



自湘水南行

落日催行舫，逶迤洲渚間。  
誰云有物役，乘此更休閒。  
暝色生前浦，清暉發近山。  
中流澹容與，惟愛鳥飛還。

南還湘水言懷

拙宦今何有，勞歌念不成。  
十年乖夙志，一別悔前行。  
歸去田園老，儻來軒冕輕。  
江間稻正熟，林裏桂初榮。  
魚意思在藻，鹿心懷食苹。  
時哉苟不達，取樂遂吾情。

初入湘中有喜

征鞍窮郢路歸棹入湘流望鳥惟貪疾聞猿亦罷愁兩  
邊楓作岸數處橘為洲却計從來意翻疑夢裏遊

商洛山行懷古

園綺值秦末嘉遁此山阿陳迹向千古荒途始一過碩  
人久淪謝喬木自森羅故事昔嘗覽遺風今豈訛泌泉  
空活活樵叟獨皤皤是處清暉滿從中幽興多長懷赤  
松意復憶紫芝歌避世辭軒冕逢時解薜蘿盛明今在  
運吾道竟如何

耒陽溪夜行

乘夕棹歸舟緣源路轉幽月明看嶺樹風靜聽溪流嵐  
氣船間入霜華衣上浮猿聲雖此夜不是別家愁

江上

長林何繚繞遠水復悠悠盡日餘無見為心那不愁憶  
將親愛別行為主恩酬感激空如此芳時屢已過

自彭蠡湖初入江

江岫殊空闊雲煙處處浮上來群噪鳥中去獨行舟牢

落誰相顧逶迤日自愁更將心問影于役復何求

赴使瀧峽

蹊路日幽深寒空入兩嶽霜清百丈水風落萬重林夕  
鳥聯歸翼秋猿斷去心別離多遠思況乃歲方陰

湖口望廬山瀑布水

萬丈洪泉落迢迢半紫芬犇飛下雜樹洒落出重雲日  
照虹蜺似天清風雨聞靈山多秀色空水共氤氳

彭蠡湖上

沿涉經大湖湖流多行洑決晨趨北渚逗浦已西日所  
適雖淹曠中流且閒逸瑰詭良復多感見乃非一廬山  
直陽許孤石當陰術一水雲際飛數峯湖心出象類何  
交糾形言豈深悉且知皆自然高下無相恤

經江寧覽舊跡至玄武湖

南國更數世北湖方十洲天清華林苑日晏景陽樓果  
下迴仙騎津傍駐綵旒鳧鷖喧鳳管荷芰鬪龍舟七子  
陪詩賦千人和棹謳應言在鎬樂不讓橫汾秋風俗因

紆慢江山成易由駒王信不武孫叔是無謀佳氣日將  
歇霸功誰與修桑田東海變麋鹿姑蘇遊否運爭三國  
康時劣九州山雖幕府在館豈豫章留水淀還相閱菱  
歌亦故道雄圖不足問惟想事風流

入廬山仰望瀑布水

絕頂有懸泉喧喧出煙杪不知幾時歲但見無昏曉閃  
閃青崖落鮮鮮白日皎洒流濕行雲濺沫驚飛鳥雷吼  
何噴薄箭馳入窈窕昔聞山下蒙今乃林巒表物情有

詭激坤元曷紛矯默然置此去變化誰能了

出為豫章郡途次廬山東巖下

茲山鎮何所乃在澄湖陰下有蛟螭伏上與虹蜺尋靈  
仙未始曠窟宅何其深雙闕出雲峙三宮入煙沈攀崖  
猶昔境種杏非舊林想像終古跡惆悵獨徃心紛吾嬰  
世網數載忝朝簪孤根自靡託量力況不任多謝周身  
防常恐橫議侵豈匪鷓鴣列惕如泉壑臨迨茲刺江郡  
來此滌塵襟有趣逢樵客忘懷狎野禽棲閒義未果用

拙歡在今願言答休命歸事丘中琴

巡屬縣道中作

春令夙所奉駕言遵此行途中却郡椽林下招村民至  
邑無紛劇來人但歡迎豈伊念邦政爾實在時清短才  
濫符竹弱歲起柴荆再入江村道永懷山藪情矧逢陽  
節獻默聽時禽鳴迹與素心別感從幽思盈流芳日不  
待夙志蹇無成知命且何欲所圖惟退耕華簪極身泰  
衰鬢慙木榮苟得不可遂吾其謝世嬰



南還以詩代書贈京都舊寮

薄宦晨昏闕遵途義取斯窮愁年貌改寂歷爾胡為不  
諂詞多忤無容禮益卑微生尚何有遠跡固其宜思擾  
梁山曲情遙越鳥枝故園從海上良友邈天涯雲雨歎  
一別川原勞載馳上慙伯樂顧中負叔牙知去國誠寥  
落經途弊險巖歲逢霜雪苦林屬蕙蘭萎欲贈幽芳歇  
行悲舊賞移一從關作限兩見月成規苒苒窮年籥行  
行盡路歧征鞍稅北渚歸帆指南垂樹晚猶蔥蒨江寒

尚渺瀾土風從楚別山水入湘竒石瀨相奔觸煙林更  
蔽虧層崖夾洞浦輕舸泛澄漪松篠行皆傍禽魚動輒  
隨惜哉邊地隔不與故人窺疇昔陪鴛鴦朝陽振羽儀  
來音雖寂寞接景每逶迤朝罷冥塵事賓來話酒卮邀  
歡逐芳草結興選華池及此風成歎何時霧可披自憐  
無用者誰念有情離望美音容闊懷賢夢想疲因聲達  
霄漢持拙守東陂

初發道中贈王司馬兼寄諸公

昔歲嘗陳力中年退屏居承顏方弄鳥放性或觀魚曾  
是安疵拙誠非議卷舒林園事益簡煙月賞恒餘不意  
棲愚谷無階奉詔書湛恩均大造弱植愧空虛肅命趨  
仙闕僑裝撫傳車念行開祖帳憐別降題輿誰謂風期  
許叨延禮數殊義沾投分末情及解攜初追餞扶江界  
光輝燭里閭子雲應寂寞公緒為吹噓景物春來異音  
容日向踈川原行稍穩鍾鼓聽猶徐林隔王公輦雲迷  
班氏廬戀親惟委咽思德更躊躇徇義當由此懷安乃

金  
卷四  
闕如願酬明主惠行矣豈徒歟

夏日奉使南海在道中作

緬然萬里路赫曦三伏時飛走逃深林流爍恐生疵行  
李豈無苦而我方自怡肅事誠在公拜慶遂及私展力  
慚淺效銜恩感深慈且欲湯火蹈况無鬼神欺朝發高  
山阿夕濟長江湄秋瘴寧我毒夏水胡不夷信知道存  
者但問心所之呂梁有出入乃覺非虛詞

湏陽峽

行舟傍越岑窈窕越溪深水閣先秋冷山晴當晝陰重  
林間五色對壁聳千尋惜此生遐遠誰知造化心

使至廣州

昔年嘗不調茲地亦遭迴本謂雙鳧少何知駟馬來人  
非漢使橐郡是越王臺去去雖殊事山川長在哉

春江晚景

江林皆秀發雲日復相鮮征路那逢此春心益眇然興  
來祇自得佳處莫能傳薄暮津亭下餘花滿客船

與王六履震廣州津亭曉望

明發臨前渚寒來淨遠空  
水紋天上碧日氣海邊紅  
景物紛為異人情賴此同  
乘桴自有適非欲破長風

初發曲江谿中

溪流清且深松石復陰臨  
正爾可嘉處胡為無賞心  
我由不忍別物亦有緣侵  
自匪嘗行邁誰能知此音

自始興谿夜上赴嶺

嘗畜名山意滋為世網牽  
征途屢及此初服已非然  
日

落青巖際谿行綠篠邊去舟乘月後歸鳥息人前數曲  
迷幽嶂連圻觸聞泉深林風緒結遙夜客情懸非梗胡  
為泛無膏亦自煎不知于役者相樂在何年

奉使自藍田玉山南行

征騾入雲壑始憶步金門通籍微軀幸歸途明主恩匪  
惟徇行役兼得慰晨昏是節暑云熾紛吾心所尊海縣  
且悠緬山郵日駿奔徒知惡囂事未暇息陰論曉武經  
陳迹衡湘指故園水聞南澗險煙望北林繁遠靄千巖

合幽聲百籟喧陰泉夏猶凍陽景晝方暝懿此高深極  
徒令夢想存盛明期有報長往復奚言

巡按自灑水南行

理棹雖云遠飲冰寧有惜況乃佳山川怡然傲潭石奇  
峯岌前轉茂樹隈中積猿鳥聲自呼風泉氣相激目因  
詭容逆心與清暉滌紛吾謬執簡行郡將移檄即事聊  
獨歡素懷豈兼適悠悠詠靡盬庶以窮日夕

使還都湘東作



蒼庚昨歸候陽鳥今去時感物遽如此勞生安可思  
養真無上格圖進豈前期甘節往來苦壯容離別衰  
盛明非不遇弱操自云私孤檝清川渚征衣寒露滋  
風朝津樹落日夕嶺猿悲牽役而無悔坐愁祇自怡  
當須報恩已終爾謝塵縉

旅宿淮陽亭口號

日暮荒亭上悠悠旅思多故鄉臨桂水今夜眇星河  
暗草霜華發空亭鴈影過興來誰與晤勞者自為歌

曲江集卷四

欽定四庫全書薈要卷一萬三千五百五十九

集部

曲江集卷五

唐 張九齡 撰

詩

望月懷遠

海上生明月天涯共此時  
情人怨遙夜竟夕起相思  
滅燭憐光滿披衣覺露滋  
不堪盈手贈還寢夢佳期

秋夕望月

清迴江城月流光萬里同所思如夢裏相望在庭中皎  
潔青苔露蕭條黃葉風含情不得語頻使桂華空

詠鷺

海鷺何微眇乘春亦暫來豈知泥滓濺祇見玉堂開繡  
戶時雙入華軒日幾迴無心與物競鷹隼莫相猜

詠史

大德始無頗中智是所是居然已不一況乃務相詭小  
道致泥難巧言因萋毀穰侯或見遲蘇生得陰揣輕既

長沙傳重亦邊郡徙勢傾不幸然跡在胡寧爾滄溟所  
為大江漢日來委澧水雖復清魚鱉豈游此賢哉有小  
白籩中有管氏若人不世生悠悠多如彼

勅賜寧王池宴

賢王有池館明主賜春遊淑氣林間發恩光水上浮徒  
叅和鼎地終謝巨川舟皇澤空如此輕生莫可酬

龍門旬宴得月字韻

恩華逐芳歲形勝兼韶月中席傍魚潭前山倚龍闕花

迎妙妓至鳥避仙舟發宴行良在茲再來情不歇

天津橋東旬宴得歌字韻

清洛象天河東流形勝多朝來逢宴喜春盡却妍和泉  
鮪歡時躍林鴛醉後歌賜恩頻若此為樂奈人何

上陽水牕旬宴得移字韻

河漢非應到汀洲忽在斯仍逢帝樂下如逐海槎窺春  
賞時將換皇恩歲不移今朝遊宴所莫比天泉池

故刑部李尚書荆谷山集會

嘗聞繼老聃身退道彌耽結宇倚青壁疏泉噴碧潭苔  
石隨人古煙花寄酒酣山光紛向夕歸興杜城南

三月三日申王園亭宴集

稽亭追往事昨苑勝前聞飛閣凌芳樹華池落綵雲藉  
草人留酌銜花鳥赴群向來同賞處惟恨碧林曛

恩賜樂遊園宴

寶筐延後命供帳序群公彤勝宜春接威儀建禮同晞  
陽人似露解愠物從風朝慶千齡始年華二月中輝光

金五口人卷五  
變草木和氣發絲桐歲歲長無事徒知樂九功

驪山下逍遙公舊居遊集

君子體清尚歸處有兼資雖然經濟日無忘幽棲時卜  
居舊何所休澣嘗來茲岑寂罕人至高深獲我思松澗  
聆遺風蘭林覽餘滋往事誠已矣道存猶可追遺子後  
黃金作歌先紫芝明德有自來奕世皆秉彝豈與磻溪  
老崛起周太師我心希碩人逮此問元龜怊悵既懷遠  
沈吟亦省私已云寵祿過況在華髮衰軒蓋有迷復丘



壑無磷緇感物重所懷何但止足斯

祠紫蓋山經玉泉山寺

指途躋楚望策馬望荆岑稍稍松篁入泠泠澗谷深觀  
竒遂幽映歷險忘嘔嶽上界投佛影中天揚梵音焚香  
懺在昔禮足誓來今靈異若有對聖先其可尋高僧聞  
逝者遠俗是初心蘚剝經行處猿啼燕坐林歸真已寂  
滅留迹豈埋沈法地自茲廣何云千萬金

冬中至玉泉山寺屬窮陰冰閉崖谷無景及仲

春行縣復往馬故有此作

靈境信幽絕芳時重暄妍再來及茲勝一遇非無緣萬  
木柔可結千花敷欲然松間鳴好鳥林下流清泉石壁  
開精舍金光照法筵真空本自寂假有聊相宣復此灰  
心者仍追巢頂禪簡書雖有畏身世亦相捐

郢城西北有大古塚數十觀其封域多是楚時  
諸王而年代久遠不復可識惟直西有樊妃塚  
因後人為植松柏故行路盡知之

蘋藻生南澗蕙蘭秀中林嘉名有所在芳氣無幽深楚  
子初逞志樊妃嘗獻箴能令更擇士非直罷從禽舊國  
皆湮滅先王亦莫尋惟傳賢媛隴猶結後人心牢落山  
川意蕭疎松柏陰破牆時直上荒徑或斜侵惠問終不  
絕風流獨至今千春思窈窕黃鳥復哀音

戲題春意

一作江南守江林三四春相鳴不及鳥相樂喜關人日  
守朱絲直年催華髮新淮陽祇有卧持此度芳辰

同綦母學士月夜聞鴈

棲宿豈無意飛飛更遠尋  
長途未及半中夜有遺音  
月思關山笛風號流水琴  
空聲兩相應幽感一何深  
避繳歸南浦離羣叫北林  
聯翩俱不定憐爾越鄉心

立春日晨起對積雪

忽對林亭雪瑤華處處開  
今年迎氣始昨夜伴春迴  
玉潤窗前竹花繁院裏梅  
東郊齋祭所應見五神來

庭梅詠

芳意何能早孤榮亦自危更憐花蒂弱不受歲寒移朔  
雪那相妬陰風已屢吹馨香雖尚爾飄蕩復誰知

照鏡見白髮聯句

宿昔青雲志蹉跎白髮年誰知明鏡裏形影自相憐

折楊柳

纖纖折楊柳持此寄情人一枝何足貴憐是故園春遲  
景那能久流芳不及新更愁征戍客容鬢老邊塵

巫山高

巫山與天近煙景長青熒此中楚王夢夢得神女靈神  
女去已久雲雨空冥冥惟有巴猿嘯哀音不可聽

剪綵

姹女矜容色為花不讓春既爭芳意早誰待物華真葉  
作叅差發枝從點綴新自然無限態長在艷陽人

聽箏

端居正無緒那復發秦箏纖指傳新意繁絃起怨情悠  
揚思欲絕掩抑態還生豈是聲能感人心自不平

賦得自君之出矣

自君之出矣不復理殘機思君如滿月夜夜減清輝

荊州作二首

先達志其大求意不約文士伸在知己已況仕於君微  
誠夙所尚細故不足云時來忽易失事往良難分顧念  
凡近姿焉欲殊常勲亦以行則是豈必素有聞千慮且  
猶跌萬緒何其紛進士苟非黨免相安得群衆口金可  
鑠孤心絲共棼意忠仗朋信語勇同敗軍古劍徒有氣

幽蘭祇自薰高秩向所忝於義如浮雲

其二

千載一遭遇往賢所至難問余奚為者無階忽上搏明  
聖不世出翼亮非苟安崇高自有配孤陋何足干過恩  
一時來竊位三歲寒誰謂誠不盡知窮力亦殫雖致負  
乘寇初無挾術鑽浩蕩出江湖翻覆如波瀾心傷不材  
樹自念獨飛翰徇義在匹夫報恩猶一殮況乃山水澤  
效無毫髮端內訟已慙沮積毀今摧殘胡為復惕息傷



鳥畏虛彈

在郡秋懷二首

秋風入前林蕭颺鳴高枝寂寞遊子思寤歎何人知宦  
成名不立志存歲已馳五十而無聞古人深所疵平生  
去外飾直道如不羈未得操割效忽復寒暑移物情自  
古然身退毀亦隨悠悠滄江渚望望白雲涯路下霜且  
降澤中草離披蘭艾若不分安用馨香為

其二

庭蕪生白露歲候感遐心策蹇慙遠途巢枝思故林小  
人恐致寇終日如臨深魚鳥好自逸池籠安所欽掛冠  
東都門採薇南山岑議道誠愧昔覽分還愜今無然憂  
成老空爾白頭吟

郡府中每晨興輒見羣鶴東飛至暮又行列而  
返哢啖雲路甚和樂焉予愧獨處江城常目送  
此意有所羨遂賦以詩

雲間有數鶴撫翼意無違曉日東田去宵煙北渚歸謹

呼良自適羅列好相依遠集長江靜高翔衆鳥稀豈煩  
仙子馭何畏野人機却念乘軒者拘留不得飛

忝官二十年盡在內職及為郡嘗積戀因賦詩  
馬

江流去朝宗晝夜茲不舍仲尼在川上子牟存闕下聖  
達有由然孰是無心者一郡苟能化百城豈云寡愛禮  
誰為羊戀主吾猶馬感初時不載思奮翼無假閒宇嘗  
自閉沈心何用寫攬衣步前庭登陴臨曠野白水生迢

遞清風寄蕭洒願言采芳澤終朝不盈把

初秋憶金均兩弟

江渚秋風至他鄉離別心孤雲愁自遠一葉感何深憂  
喜嘗同域飛鳴忽異林青山西北望堪作白頭吟

二弟宰邑南海見羣鴈南飛因成詠以寄

鴻鴈自北來嗷嗷度煙景嘗懷稻梁惠豈憚江山永小  
大每相從羽毛當自整雙鳧侶晨泛獨鶴叅宵齧言為我  
更南飛因書至梅嶺

將發還鄉示諸弟

歲陽亦頽止林意日蕭滅云胡當此時緬邁復為客至  
愛孰能捨名義來相迫負德良不貲輸誠靡所惜一木  
逢厦構纖塵願山益無力主君恩寧利客卿璧去去榮  
歸養憮然歎行役

叙懷二首

弱歲讀羣史抗迹追古人被褐有懷玉佩印從負薪志  
合豈兄弟道行無賤貧孤根亦何賴感激此為鄰

其二

晚節從卑秩歧路良非一既聞持兩端復見挾三術木  
瓜誠有報玉楮論無實已矣直躬者平生壯圖失去去  
勿重陳歸來茹芝朮

秋懷

感惜芳時換誰知客思懸憶隨鴻向暖愁學馬思邊留  
滯機還息紛拏網自牽東南起歸望何處是江天

雜詩五首

孤桐亦胡為百尺傍無枝踈陰不自覆脩幹欲何施高  
岡地復迴弱植風屢吹凡鳥已相噪鳳凰安得知

其二

蘿藦必有託風霜不能落酷在蘭將蕙甘從葵與藿運  
命雖為宰寒暑自迴薄悠悠天地間委順無不樂

其三

良辰不可遇心賞更蹉跎終日塊然坐有時勞者歌庭  
前攬芳蕙江上託微波路遠無能達憂情空復多

其四

湘水弔靈妃斑竹為情緒漢水訪遊女解佩無誰與同  
心不可見異路空延佇浦上青楓林津傍白沙渚行吟  
至落日坐望祇愁予神物亦豈孤佳期竟何許

其五

木直幾自寇石堅亦他攻何言為用薄而與土膏同物  
累有固然誰能取徑通纖纖良田草靡靡惟從風日夜  
沐甘澤春秋等芳叢生性苟不夭香臭誰為中道家貴



至柔儒生何固窮終始行一意無乃過愚公

故刑部李尚書挽歌詞三首

仙宗出趙北相業起山東明德嘗為禮嘉謀屢作忠論  
經白虎殿獻賦甘泉宮與善今何在蒼生望已空

其二

宿昔三台踐華榮駟馬歸印從青鎖拜翰入紫宸揮題  
劍恩方重藏舟事已非龍門不可望感激涕沾衣

其三

永歎常山寶沈埋京兆阡同盟會五月華表記千年渺  
漫野中草微茫空裏烟共悲人事絕惟對杜陵田

故徐州刺史贈吏部侍郎蘇公挽歌詞三首

韋玄方繼相荀爽復齊名在貴兼天爵能賢出世卿學  
聞金馬詔神見玉人清藏壑今如此為山遂不成

其二

相如只謝病子敬忽云亡豈悟瑤臺雪分雕玉樹行清  
規留草議故事在封章本謂山公啟而今歿始揚

其三

返葬長安陌秋風簫鼓悲柰何相送者不是平生時寒  
影催年急哀歌助輓遲寧知建旗罷丹旆向京師

故滎陽君蘇氏挽歌詞三首

門緒公侯列嬪風詩禮行松蘿方有寄桃李忽無成劔  
去雙龍別雛哀九鳳鳴何言嶧山樹還似半心生

其二

永歎芳魂斷行看草露滋二宗榮盛日千古別離時竟

罷生芻贈空留畫扇悲客車候曉發何歲是歸期

其三

縞服紛相送玄扃翳不開更悲泉火滅徒見柳車迴舊  
室容衣奠新塋拱樹栽惟應月照簾潘岳此時哀

眉州康司馬挽歌詞

家受專門學人稱入室賢劉楨徒有氣管輅獨無年謫  
去長沙國魂歸京兆阡從來匣中劍埋沒罷衝天

題畫山水障

心累猶不盡果為物外牽偶因耳目好復假丹青妍嘗  
抱野間意而迫區中緣塵事固已矣秉意終不遷良工  
適我願妙墨揮巖泉變化合群有高深侔自然置陳北  
堂上倣像南山前靜無戶庭出行已茲地偏萱草憂可  
樹合歡忿亦蠲所因本微物況乃憑幽筌言象會自泯  
意色聊自宣對翫有佳趣使我心眇綿

曲江集卷五

欽定四庫全書薈要卷一萬三千五百六十

集部

曲江集卷六

唐 張九齡 撰

制書

南郊赦書

東封赦書

后土赦書

藉田赦書

南郊赦書

門下朕獲主三靈于今一紀聽政中昃每不敢康觀書  
乙夜將求諸道而頃年已來每思至理或遠人勿率或  
嗣歲不登淳朴未還惕厲斯在為人上而慙德奉天明  
以畏威故祝史正辭必期於陳信郊丘備禮將俟於昇  
平今宗廟降靈克開厥後乾坤交泰保合大和麟鳳龜  
龍玄符黃瑞之祉蠻夷戎狄梯山航海之琛莫不日月  
以聞道路相屬顧惟不德當茲休運欽若昭報疇咨故



實所以今年獻春恭祠后土季秋吉日追崇九廟採必  
先於曾經稽肆類於虞典爰因長至欽謁上玄告受命  
之元符昭嚴配之成績大典云備至誠克展諸侯駿奔  
來於穆之相百神受職率咸秩之文六變已陳三獻斯  
畢蓋春秋之大事莫先乎祀王者之盛禮莫重於郊柴  
燎克終感慶罔極豈予一人之福亦爾萬邦之賴宜因  
咸和之際俾承厚下之澤可大赦天下嗚呼君臣一體  
休戚共焉朕欽承天命躬傳大寶蓋憑累祖餘業得一

之符亦由羣公舊勲不二之力永言繫賴其敢忘之自  
武德已來失爵功臣知政宰輔有身無大故而亡官失  
爵子孫淪屈者所由勩責具狀以聞存者可籌其官榮  
逝者當錄其胤嗣使幽明同慶知有令辰

東封赦書

門下朕聞天監惟后后克奉天既合德以受命亦推功  
而復始厥初作者七十二君道洽跡著時至符出皆用  
事于介丘升中于上帝入神之望盖有以塞之皇王之

序固可得而言之朕接統千歲承光五葉惟祖宗之德  
在人惟天地之靈作主往有內難幽贊而集大勳間無  
外虞守成而績舊服未嘗不乾乾終日思與公卿大夫  
上下叶心聿求至理引我列聖其庶乎馨香今九有大  
寧群氓樂業時必敬授而不奪物亦順成而無天懋建  
皇極幸致大和聚乃幽遐率由咸被戎狄不軌惟文告  
而來庭麟鳳已臻將覺悟而在數以故凡百執事亟言  
大封顧惟不德初欲勿議伏以先聖儲祉與天同功荷

傳符以在今敢侑神而無報大節斯在朕何讓焉遂奉  
遵高祖太宗之業憲章乾符之典時邁東土柴告岱宗  
精意上達肸鬻來應信宿行事雲物呈祥登降之禮斯  
畢嚴配之誠獲展百神羣望莫不懷柔四方諸侯莫不  
來慶斯事天下之介福邦家之耿光也無窮之休祉豈  
獨在予非常之惠澤宜其逮下可大赦天下朕躬陟天  
門宿齋日觀時屬嚴冬雪候初夜風寒朕因露立祈恩  
誓欲代人當咎俯仰之際頓息霜飈奠獻之辰變同韶

景誠荷上天垂佑亦賴靈山吐祥詩云無德不報宜封  
太山神為天齊王禮秩加三公一等宜令所管崇飾祠  
廟環山十里禁其採樵給近山二十戶復以奉神祠率  
土之內賜脯七日任於村坊宴樂不得聚斂煩勞其節  
文有未霑及者所司比類奏聞其封祀有數處行事者  
從一處叙赦書日行五百里主者施行

后土赦書

門下昔者巡狩所至柴瘞斯行蓋取誠享以遵告類朕

恭承祖宗之烈獲主神祇之祀夙夜祇畏不敢荒寧故

勒兵朔陞先展義於汾社迴旆睢上遂有事於郊壇王

者父事天母事地則漢氏祈穀未始正名周禮降神乃

為徽福而已朕以天命之重子道為先惟茲精神在乎

敦孝庶蒙福於四海斯永康於兆人是以率由舊章敬

恭明祀嚴配之誠既展奠獻之禮又終且春秋之議大

事若祀齋祭之福庶品維祺豈獨在予而共有斯慶可

大赦天下

措田赦書

門下昔者受命為君體元立極未有不謹於禮而能見  
教於人朕其庶乎有慙作者方冊存而可舉舊章絕而  
復尋自古所行無一而廢將以上乞靈於宗社下蒙福  
於黎元朕茲精誠天實降鑒今嗣歲初吉農事將起禮  
有先於耕藉義緣奉於染盛是所嚴祇敢不敬事故躬  
載耒耜親率公卿以先萬姓遂終千畝謂敷本之為小  
何布澤之更深宜有順於發生俾無偏於行惠可大赦

天下宗廟致享務在豐潔禮經沿革必本人情籩豆之  
薦或未能備物服制之紀或有所未通宜令禮官學士  
詳議具奏朕自臨天下二紀于茲不敢荒寧日加兢業  
而災眚未弭黎人未康若有由而然則在予之責有能  
直言極諫者具以狀聞每渴賢良無忘寤寐頃雖虛佇  
未副旁求其才有王霸之畧學究天人之際智勇堪將  
帥之選政能當牧宰之舉者五品已上清官將軍都督  
刺史各舉一人孝悌力田鄉閭推挹者本州長官勘責



有才堪應務者各以名聞致仕官久歷清資始終稱著  
年漸衰邁情有可矜量子改職依前致仕宗子中有才  
行著聞比尚沈屈者委宗正勘責奏聞唐元兩營立功  
官任折衝並改與郎將郎將改與中郎其亡官失爵量  
加收叙五岳四瀆名山大川及自古聖帝明王忠臣良  
相並令所在長官以禮致祭赦書有所未該者所司比  
類奏聞亡命山澤挾藏軍器百日不首復罪如初敢以  
赦前事相言告者以其罪罪之都城內賜脯三日布告

遐邇咸使知聞

曲江集卷六